

E importacia di proteccion di Habitat



Ehemplar di Mata Pisca (Jacquina armillaris) net pafor di su habitat.

ORANJESTAD (AAN): Riba e articulo di Mata Pisca (Jacquina armillaris) Departamento di Agricultura, Cria y Pesca (DLVVM) a ricibi hopi bon reaccion. Asina a bende mas Mata Pisca den lunanan di Juli y Augustus cu den e prome 6 lunanan di e aña. Tambe tabata tin varios hende cu a yama pa informacion, unda esun mas espectacular tabata e yamada for di Curaçao.

DLVVM ta encurasha plantamento di matanan local den jardin, esta pafor di nan habitat, manera un medida adicional ariba proteccion di habitat. Habi-

tat ta un lugar unda comunmente un sorto di mata of bestia ta biba, pasobra ey e ambiente di bida ta alcanza e sorto su exigencianan. Cada sorto tin su propio habitat, pero un habitat por contene diferente sortonan.

Plantamento di matanan local den jardinnan casero, ta yudanan den nan sobrevivencia pasobra e ta ofresenan un oportunidad di crece. Sinembargo pa sobrevivencia di cierto matanan scars proteccion di habitat ta cardinal. Por pensa asina ariba matanan cu tin preferencia pa un cierto lugar of pa un cierto suelo. Manera, por

ehempel Taki (Geoffroea spinosa) y Mahawa (Ficus Britonii), ta crece primordialmente den rooi. Otro matanan scars, manera Wayaca shimaron (Guaiacum sanctum), Brasil (Haematoxylon brasiletto) y Cuashati (Krugiodendron ferreum) por haya mayoria bes ariba calichi.

Banda di e preferencia di e mata pa cierto condicionnan di bida mester corda tambe ariba practicanan cu den un jardin ta normal pero pa sobrevivencia di cierto sortonan ta perjudicioso. Den un jardin e practica di duna awa henter aña rond ta interrumpe periodo di segura cu



Ehemplar di frutanan di Mata Pisca (Jacquina Armillaris).

pa algun matanan, manera Palo di Boonchi (Erythrina velutina), ta esencial pa nan floria y reproduci. Un otro practica perjudicioso ta mantencion di un jardin casero, pasobra e ta interrumpe cierto procesonan biologico. Den mondi no tin barimento di foyo, ni chapiemento di yerbe of combatimento di insectonan. Consecuentemente tur e relacionnan biologico cu ta forma e red di bida por tuna lugar normal, percurando pa circunstancianan optimal di germinacion di simiya y condicionnan di crecimiento.

Gobierno di Aruba conciente di e importancia di proteccion di habitat a fiha un area pa esaki y aproba un lista di matanan cu mester cay bou di e futuro landsbesluit 'Bescherming van Lokale Flora'. Ambos medidanan ta forma parti di un proceso largo, unda ainda nan legislacion mester bin cla, pa despues cuminsa implementanan. E aspecto di legislacion aki ta forma e diferencia mas importante ora compara sobrevivencia di sorto den un jardin casero cu den un habitat.

E jardin casero ta depende di e doño su boluntad, cu por deshaci di e matanan scars na su antoho. Un habitat reconoci legalmente ta depende di boluntad di pueblo y ta duna mas siguransa na manten-

cion di e sortonan. Proteccion di habitat awendia ta bira mas precario cu nunca. E densidad di e poblacion di Aruba ta hopi grandi y ta eherce hopi presion ariba e habitatnan existente, mas ariba esnan cu ta cai pafor di e area destina. Directamente ta sinti e presion, door di construccion di vivienda y indirectamente door di recreacion, profesion y minamento di suelo. Sinembargo e pueblo di Aruba ta birando mas conciente di e necesidad di proteccion di habitat. Un ehempel reciente di e habitantenan di Bubali, cu a protesta contra destruccion di e habitat di un salifia.

E habitatnan aki no ta mucho conoci cerca expertonan, pero mayoria ta reconoce nan capacidad pa colecta awa durante awacero.

DLVVM den funcion di maneho di naturalesa ta sigui encurasha e publico en general pa planta matanan local den jardin y ta ofrece esakinan na benta. Sinembargo DLVVM no ta perde for di bista e importancia di proteccion di habitat y ta traha pa esaki. Pa mas informacion por tuma contacto cu DLVVM na telefon 856473. Horarionan di benta di mata ta di 7 pa 12'or di merdia y di 1'or pa 3'or di atardi, di dialuna pa diabierna.